

Monumentonan traspasa na Monumenten Fonds ta keda di pueblo

ORANJESTAD – Recientemente gobierno a traspasa un icono, un monumento arkitektonico na e fundacion Monumenten Fonds, esta e Faro na West Punt. Pero esaki no ta e prome monumento ni e ultimo cu a wordo traspasa na e fundacion aki pa nan por busca fondo y restaura nan prome cu nan ta bay perdi pa falta di inversion y presupuesto disponible pa renoba nan.

Pero e pregunta ta keda: si cada bes cu gobierno traspasa cada monumento, pueblo ta perde un patrimonio di dje?

Patrimonio di Aruba

Durante un entrevista di Bon Dia Aruba cu directora di Stichting Monumenten Fonds, sra. Anne E. Witsenburg a aclaria cu traspaso di un monumento ta un requisito indispensable pa e fundacion aki por tin acceso na fondonan internacional specialmente for di Hulanda pa por restaura cada monumento na Aruba. Sinembargo el a laga sa cu

pesar cu nan ta bira doño, cada monumento sembra na Aruba ta y lo keda un patrimonio di e comunidad aki.

Locual e fundacion aki ta haci ta evita cu cada monumento cu ta un patrimonio tangibel di Aruba su cultura no bay perdi, sino pa preserva nan pa nos futuro generacion.

Sra. Witsenburg a laga sa

cu e monumentonan cu a ser renoba cu fondo adkiri pa medio di Monumenten Fonds ta keda propiedad di e fundacion mescos pa ehempel Stadhuis, Oficina di Monumento (Cas Henriquez), e dos watertoren na Oranjestad y San Nicolas, etc. Y como doño di e propiedadnan aki nan ta paga grondbelasting y otro impuestonan.

Pero esaki no kiermen cu pueblo di Aruba ta perde un patrimonio pasobra nan ta keda un monumento di Aruba, ya cu niun hende por bay cu nan. Ademá el a laga sa cu tin reglanan cu ta reglamenta funcionamiento di un fundacion, y den caso cu si eventualmente e fundacion aki no ta haci bon, tur cos ta bay bek pa Gobierno. “E ta keda di pueblo”, el a bisa.

Existencia di Monumenten Fonds

E ta recorda cu 18 aña pasa gobierno di Aruba mes a introduci Stichting Monumenten Fonds, pasobra Aruba no tabata un excepcion sino cu rond mundo restauracion y mantencion di monumento ta demasiado costoso.

Ademá generalmente den presupuesto di cualkier gobierno ora cu mester baha gasto e prome cos cu nan ta reduci tin di haber cu mantencion di monumento. P’esey ta importante un fundacion como Stichting Monumenten

Fonds pa conserva nos herencia cultural.

Actualmente e fundacion aki no ta ricibi subsidio mas di Gobierno for di 4 aña pasa. Sinembargo di un banda sra. Witsenburg ta haya cu si un fundacion como Stichting Monumenten Fonds no ta dependiente di gobierno, nan tin mas chens cu otro fondonan lo por duna nan facilidad di credito.

Reglanan

Igualmente ta existi regla pa locual ta maneho di monumento y Monumenten Bureau ta encarga di e parti aki. Mientras cu Monumenten Fonds nan meta ta pa rescata nos historia monumental. Pa ehecuta e proyectonan di renobacion di un monumento mester existi un coordinacion entre ambos instancia. Actualmente aunke ya caba Monumenten Fonds a traha un Master Plan relaciona cu e proyecto di E Faro, nan ta wardando e parti legal di e traspaso pa cuminsa cu e renobacion. Unabes cu nan ta bay cuminsa e proyecto naturalmente cu Monumenten Bureau ta involvi, asina sra. Anne E. Witsenburg a declara na Bon Dia Aruba.

Te hasta nan mester di un permiso di monumento otorga pa medio di Monumenten Bureau prome cu nan ta cuminsa cu e trabou, ya cu Faro ta un monumento protegi y importante pa henter Aruba. El a destaca cu e instancia aki tin hopi experiencia. Mientras cu Monumenten Fonds tin 18 aña, pero 5 aña pasa nan a renoba nan organizacion y dos aña pasa nan a cuminsa crece mas profesionalmente, pero Monumenten Bureau tin e experiencia necesario y Monumenten Fonds kier traha hunto cu nan pa desaroya proyectonan monumental. □

